

Margaret Wever di Museo Arqueologico

“E baranca tambe ta nos mes, e Arubiano mes...”



Riba e potret aki nos por mira d.r.p.d. directora di Museo Arqueologico, sra. Bibi Ruiz, minister di Cultura sra. Michelle Winklaar y Colaborador Ehecutivo di Museo Arqueologico, sra. Margaret Wever, durante e acto di apertura di exposicion “O Aruba, nos Baranca tan stima”.



Exposicion “O Aruba, nos Baranca tan stima”

ORANJESTAD - “O Aruba, nos Baranca tan stima” ta e nomber di un exposicion temporario cu Museo Arqueologico Aruba a organisa cu su partner strategico MetaCorp na Renaissance Mall. E exposicion aki den forma di grafico y video, ta enfoca riba e creatividad di e Arubiano for di Preshistoria te cu awor.

Margaret Wever ta recorda cu Museo Arqueologico ta un di e ocho institucion cultural cu a compromete di haci un expo rond di e letra di nos Himno Nacional. E decision aki a ser tuma enconexion cu 25 aña di nos Status Aparte y 35 aña di nos Himno Nacional.

Wever kende ta Colaborador Ehecutivo di Museo Arqueologico ta masha satisfecho con e expo aki a ser hinca den otro. E ta haya cu e concepto di considera e “baranca” como esencia di e expo aki, y e importante ya cu no solamente e ta nifica e isla, sino cu e piedra tabata e material cu e prome habitante di nos isla a haci uzo di djele pa no sola-

mente sobrevivir ya cu nan tabata traha herment, pero te hasta nan a prospera riba nos isla.

E exposicion aki ta resalta e creatividad di nos hendenan, asina Margaret Wever a declara na BON DIA Aruba. E exposicion aki a ser realisa den full otro espacio esta Renaissance Mall cu ta ser frecuente pa nos bishitantenan, pesey nan a envolvi ATA den e proyecto di aki. Full un team a ser forma pa asina di un forma dinamico e expo aki a ser hinca den otro. Un di e curadornan di e expo aki ta e arkeologo drs. Kelly kende a duna su contribucion y conocimiento riba e parti cientifico

Margaret Wever a contribui cu e aspecto educativo y publico di e exposicion aki. El a percura pa expo aki lo tabata bon pa tur diferente nivel di publico. E parti artistico di e expo aki tabata na encargo di e artista Contemporaneo, Rhyen Oduber cu sigur a haci un excelente trabou, manera e otro miembronan di e team creativo aki.

Durante nan reunionnan di deliberacion Margaret Wever a haya hopi importante cu e baranca pa nos no ta nifica solamente nos isla conserva pa futuro; pero tambe cu e baranca ta e “Arubiano mes”. “E baranca tambe ta nos mes, e Arubiano mes, cu nos ta para hopi fuerte, y nos ta creativo, y nos ta innovativo. Por ta nos mes no ta consciente di dje, pero te hasta den temporadanan dificil tin biaha bo ta destaca, y bo ta bin cu ideanan cu bo mester sigui dilanti y nos ta lucha y nos ta logra”, asina Margaret Wever di Museo Arqueologico a declara na BON DIA Aruba. Un aspecto cu tambe a ser resalta di e expo aki tin di haber ora cu refineria Lago a cera. Margaret Wever a bisa cu e tabata un hecho impresionante cu a a sosode na 1985, y ora Lago a cera a ser crea un ambiente di panico total. Nan a bay busca mas informacion riba e acontecimiento aki, y tur loke nan a haya a produci un impacto cerca nan, ya cu esaki tabata un momento unda Aruba mester ta creativo; y nos a demostra un

biaha mas cu Aruba ta un pueblo creativo. E exposicion a ser organisa di un forma tematico ya cu cada panel mester conta un historia riba su mes, y nan tin un correlacion cu e historia cu ta ser conta, y no ta haci niun diferencia di ki banda e publico kier cuminsa. Ya cu e ta bay compronde, y e ta bay haya informacion y cada informacion ta para riba su mes, y tog ora bo ta lesa full e expo aki, e ta forma un unidad completo. E ta un expo ilustrativo y dinamico caminda ta ser refleha un proceso historico cu ta evoluciona cu ta cuminsa for di Preshistoria te cu awor.

Museo Arqueologico ta habri su porta pa publico awe for di 10 am pa 5’or pa asina tur persona cu tin liber riba e dianan aki tin e oportunidad di bishita Museo, y alabes por cana bay Renaissance Mall na unda por disfruta di e exposicion temporario nobo den cuadro di celebracion di 25 aña di Status Aparte y 35 aña di Himno y Bandera, djis sigui e piedranan chikito...□